

समे — 12:25

<><><><><><>

CM-Gulmarg Meet

मुख्यमंत्री उमर अब्दुल्ला होरें कल आखेआ जे गुलमर्ग ते पहलगाम आली सैलानी थाहरें इक दे बाद इक केई बैठकां लाना, लोकें अंदर बसाह् भरोसा पैदा करियै उंदे मनै च आतंकी हमलें दे बाद बैठे दे डर—त्राह् गी खत्म करना ते लोकें गी कश्मीर औने लेई प्रेरत करना ऐं गुलमर्ग च कल इक उच्ची सतह् दी बैठक दी अध्यक्षता करने दे बाद उनें एह् गल्ल आख्खी। मुख्यमंत्री होरें कर्तन हालात च बी उम्मीद ते सकारात्मक सोच रखने दे महत्व गी उजागर कीता। पहलगाम आतंकी हमले दे बाद, सैलानिएं लेई बंद रखी गेदिएं किश सैलानी थाहरें दे मुद्दें बारे गल्ल करदे होई उमर अब्दुल्ला होरें आखेआ जे ऐसिएं 48 थाहरें गी परतियै खोलने बारे बड़ी संजीदगी कन्ने सोच बचार चलै करदा ऐ।

<><><><><><>

Speaker House Panels

जम्मू कश्मीर विधान सभा दे स्पीकर होरें 9 हाउस कमेटिएं दा गठन कीता ऐ। इंदे चा त्रै नियम कायदे ते विधानसभा दे कम्मकाज गी दिक्खगंन। आकाशवाणी जम्मू संवाददाता दी रिपोर्ट मूजब सत्ताधारी नैशनल कांफ्रेंस दी अगुवाई आला गठबंधन 6 समितिएं दी अध्यक्षता करोग जिसलै के बाकी त्रै दी अध्यक्षता विपक्ष गी सौंपी गई ऐ। सत्ताधारी गठबंध च नैशनल कांफ्रेंस दे 4 विधायकें गी 4 समितिएं दा ते कांग्रेस ते सीपीआई(एम) दे इक—इक विधायक गी इक—इक पैनल दी अगुवाई सौंपी गई ऐ।

<><><><><><>

Mortal Shell

जम्मू शैहर दे बाहरले इलाकें नरवाल दी ट्रांसपोर्ट नगर थाहर शिड़क दे कंडे त्रै लाईव मोटार शैल लब्धे न। आकाशवाणी जम्मू संवाददाता दी रिपोर्ट मूजब एह् शैल मकामी पुलस नै कल गश्त दरान दिक्खे। शैल लब्धने मगरा इलाकें दी घेराबंदी करी लेती गई ते बम्ब नकारा करने आले दस्ते गी मौके आली थाहर पर सद्देआ गेआ। जिनें इनेंगी नकारा बनाई दित्ता। एह् शैल इत्थें कियां पुज्जे, इस गल्ला दी जांच कीती जा'रदी ऐ।

<><><><><><>

All Party Delegation

कांग्रेस सांसद शशि थरूर होर पनामा च सर्वदलीय प्रतिनिधिमंडल दी अगुवाई करै करदे न। उ'नें अज्ज आतंकवाद दे खलाफ भारत दे सख्त रौंS गी फही पक्का कीता ऐ। श्री थरूर होरें आखेआ ऐ जे देश कुसै बी आतंकी हमले दा सख्ती कन्ने जोआब देग। पनामा च भारत दे राजदूती दफतरै च आयोजित इक कार्यक्रम च श्री थरूर होरें आखेआ जे पहलगाम च होए दा जालिमाना आतंकी हमला ओकड़े माड़े उद्देश्यें गी पुर करने लेई कीता गेआ हा, जिनें'गी पाकिस्तानी सेना, पर्यटन दे कन्ने बधै—मठोआ करदी कश्मीरी अर्थबवस्था गी कमजोर करने लेई अपना ना चांह्दी ऐ। इस प्रतिनिधिमंडल नै पनामा गणराज्य दे राष्ट्रपति जोस राउल

मुलिनो हुं'दे कन्नै बी मलाटी कीती। इस बहुदलीय प्रतिनिधिमंडल नै पनामा ऐसंबली दे अध्यक्ष डाना कास्ताननेडा हुं'दे कन्नै बी गल्लबात कीती।

<><><><><><>

PSA

किश्तवाड़ दे जिला विकास कमीशनर राजेश कुमार शवन होरें दऊं जनेंगी जन सुरक्षा कनून तैहत हिरासतै च लैने दा हुक्म जारी कीता ऐ। इनें दऊं जनें च इक आतंकवादिऐं लेई कम्म करने आला ओवर ग्राउंड वर्कर रूस्तम अली भागवान बी शामिल ऐ जिसलै जे दुए दी पंछान अरशद हुसैन दे तौरा पर कीती गई ऐ जेहड़ा केई चोरिएं ते मामले च शामिल हा। अधिकारिएं जानाकरी दित्ती ऐ जे एह् दवै इलाके च आम लोकें दी सुरक्षा लेई खतरा न, इस करियै इनेंगी हिरासतै लैने दा हुक्म जारी कीता गेआ ऐ।

<><><><><><>

IPL

आईपीएल दे प्लेऑफ मैच अज्ज थमां शुरू होआ'रदे न। अज्ज संजा साढ़े 7 बजे पंजाब किंग्स ते रॉयल चैलेंजर्स बैंगलुरु बश्कार पैह्ला क्वालीफायर मकाबला मुलानपुर च होग। एलिमिनेटर राउंड च कल मुंबई इंडियन्स दा मकाबला गुजरात टायट्स कन्नै होग। आईपीएल दा फाइनल मकाबला 3 जून गी अहमदाबाद च होग।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कटुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह् कटुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी जम्मू कश पंजीतीर्थी 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>